

**REGIONAL NEWS UNIT
ALL INDIA RADIO, AGARTALA
Date: 28-02-2026
Time: 07:55-08:05 PM Hrs
BENGALI EVENING BULLETIN**

Headlines :

- (১) প্রধানমন্ত্রী নরেন্দ্র মোদী আজ জাতীয় স্তরে এইচ.পি.ভি টিকাকরণ অভিযানের উদ্বোধন করেন।
- (২) কৃষি মন্ত্রী রতন লাল বলেছেন, রাজ্য সরকার ফুল উৎপাদনের বৃদ্ধি ত্বরান্বিত করতে বিশেষ পদক্ষেপ নিয়েছে।
- (৩) আগামী ২রা মার্চ থেকে ২৪শে মার্চ পর্যন্ত আদিবাসী সম্প্রদায়ের সমৃদ্ধ সাংস্কৃতিক ঐতিহ্য উদযাপন করা হবে।
- (৪) মহিলা আন্তর্জাতিক মাস্টার অর্শিয়া দাস রাজ্যে ফিরেই উষ্ণ সংবর্ধনা পেলো।

State Level launching program of HPV:

প্রধানমন্ত্রী নরেন্দ্র মোদী আজ রাজস্থানের আজমির শহরে জাতীয় স্তরে এইচ.পি.ভি টিকাকরণ অভিযানের উদ্বোধন করেন। প্রতিরোধমূলক স্বাস্থ্য-পরিষেবা শক্তিশালীকরণ এবং নারীদের কল্যাণে অগ্রগতির লক্ষ্যে একটি বড় পদক্ষেপ হিসেবে, প্রধানমন্ত্রী ১৪ বছর বয়সী মেয়েদের জন্য হিউম্যান প্যাপিলোম্যাবাইরাস টিকাকরণের উদ্দেশ্যে দেশব্যাপী একটি প্রচার অভিযান শুরু করেছেন। এই উদ্যোগের লক্ষ্য জরায়ু মুখের ক্যান্সার প্রতিরোধ করা।

অনুষ্ঠানে প্রধানমন্ত্রী বলেন, কেন্দ্রীয় সরকার সর্বদা নারীদের ক্ষুদ্রতম সমস্যার সমাধানকেও অগ্রাধিকার দিয়েছে। তিনি বলেন, এইচপিভি টিকাকরণ অভিযান দেশের নারীদের ক্ষমতায়নের লক্ষ্যে এই অভিযান একটি গুরুত্বপূর্ণ পদক্ষেপ।

সাংসদ রাজীব ভট্টাচার্য আই.জি.এম হাসপাতালে রাজ্যভিত্তিক এইচপিভি টিকাকরণ অভিযানের সূচনা করেন। আগামী ৩ মাস এই অভিযান চলবে। এই বিষয়ে তিনি বলেন, এই রোগের প্রধান কারণ হলো হিউম্যান প্যাপিলোমা ভাইরাস সংক্রমণ। যাদের ১৪ বছর বা তার বেশি বয়স কিন্তু ১৫ বছর পূর্ণ হয়নি সেই সমস্ত কিশোরীদের এই টিকা দেওয়া হবে। এই অভিযানে রাজ্যে প্রায় ১৭ হাজার ৫০০ জন কিশোরীকে টিকা দেওয়া হবে। আগরতলা গভর্নমেন্ট মেডিক্যাল কলেজ এন্ড জি বি হাসপাতাল, আই জি এম হাসপাতাল, ত্রিপুরা মেডিক্যাল কলেজ হাসপাতাল সহ সমস্ত প্রাথমিক স্বাস্থ্যকেন্দ্র, সামাজিক স্বাস্থ্যকেন্দ্র, মহকুমা স্বাস্থ্যকেন্দ্র, জেলা হাসপাতালগুলিতে এই টিকা প্রদান করা হবে।

টিকাকরণের রাজ্যভিত্তিক সূচনা অনুষ্ঠানে উপস্থিত ছিলেন পরিবার পরিকল্পনা এবং রোগ প্রতিরোধক অধিকারের অধিকর্তা ডা: অঞ্জন দাস, জাতীয় স্বাস্থ্য মিশন ত্রিপুরার যুগ্ম মিশন অধিকর্তা ডাঃ নূপুর দেববর্মা, স্বাস্থ্য এবং পরিবার কল্যাণ সমিতির সদস্য সচিব ডাঃ শৌভিক দেববর্মা, পশ্চিম ত্রিপুরার মুখ্য স্বাস্থ্য আধিকারিক ডাঃ শংকর চক্রবর্তী প্রমুখ।

CFL Ratanlal Nath:

কৃষি মন্ত্রী রতন লাল বলেন, রাজ্য সরকার ফুল উৎপাদনের বৃদ্ধিতে বিশেষ পদক্ষেপ নিয়েছে। আজ গোমতি জেলার উদয়পুরের গোকুলপুরে কেন্দ্রীয় ফ্লোরিকালচার এবং ল্যান্ডস্কেপিং কেন্দ্র উদ্বোধন করে তিনি একথা বলেন। তিনি বলেন, ত্রিপুরার উর্বর মাটি, পর্যাপ্ত বৃষ্টিপাত ও উষ্ণমণ্ডলীয় জলবায়ু বিভিন্ন প্রজাতির ফুল চাষের ব্যাপক সম্ভাবনা রয়েছে।

Jackson Gate Mayor:

আগরতলা পুর নিগমের মেয়র দীপক মজুমদার, শহরে বেআইনিভাবে দখলকারী ব্যবসায়ীদের স্ব-উদ্যোগে উঠে যাওয়ার আবেদন জানিয়েছেন। আজ জ্যাকসন গেট সংলগ্ন এলাকা পরিদর্শনে এসে এলাকার ব্যবসায়ীদের নিগমের কাজে সহযোগিতা করার আহ্বান জানান তিনি। স্ট্রিট ভেঙারদের উদ্দেশ্যে তিনি বলেন রাত এগারোটার পর রাস্তার তাদের দোকান থাকলে তাদের সরিয়ে দেওয়া হবে।

National Science Day:

জাতীয় বিজ্ঞান দিবসে আগরতলার প্যারাডাইস চৌমুহনিত্তে বিজ্ঞানী মনীষীদের প্রতি শ্রদ্ধা জানাল ব্ৰেকথ্ৰু সাইন্স সোসাইটি। ব্ৰেকথ্ৰু সায়েন্স সোসাইটির পক্ষ থেকে বৈজ্ঞানিক চিন্তাভাবনা প্রচার এবং সি.ভি. রমনের 'রামন এফেক্ট' আবিষ্কারকে স্মরণ করার জন্য এই অনুষ্ঠানের আয়োজন করা হয়। অনুষ্ঠানে উপস্থিত ছিলেন ব্ৰেকথ্ৰু সায়েন্স সোসাইটি র উপদেষ্টা মন্ডলীর সদস্য তথা ত্রিপুরা বিশ্ববিদ্যালয়ের প্রাক্তন অধ্যাপক প্রিয়শঙ্কর চৌধুরী, ডা: স্বপন কুমার দাস প্রমুখ।

Operation Lions Roar:

ইসরায়েলি প্রধানমন্ত্রী বেঞ্জামিন নেতানিয়াহু আজ নিশ্চিত করেছেন যে ইসরায়েল এবং মার্কিন যুক্তরাষ্ট্র ইরানের বিরুদ্ধে 'অপারেশন Lions Roar' নামে একটি যৌথ সামরিক অভিযান পরিচালনা করেছে। তিনি ইরানি শাসকগোষ্ঠীর অস্তিত্বের হুমকি দূর করার জন্য এই অভিযানকে প্রয়োজনীয় বলে বর্ণনা করেছেন। এই পরিস্থিতিতে ইরানে বসবাসরত ভারতীয় নাগরিদদের জন্য নির্দেশিকা জারি করেছে বিদেশ মন্ত্রক। ইজরায়েলে বসবাসকারী সমস্ত

ভারতীয় নাগরিককে সর্বোচ্চ সতর্কতা অবলম্বন এবং সর্বদা সতর্ক থাকার পরামর্শ দেওয়া হয়েছে। পাশাপাশি হেল্পলাইন নম্বরও চালু করা হয়েছে।

Cloth distribution:

আসন্ন দোল পূর্ণিমা উপলক্ষে আগরতলা শাখার উদ্যোগে আজ আগরতলা সেন্ট্রাল রোড শিব বাড়ি প্রাঙ্গনে আয়োজিত এক অনুষ্ঠানে তিনশ জন দুস্থ মহিলাদের মধ্যে বস্ত্র বিতরণ করা হয়। শ্রী শ্রী হরিভক্তি প্রচারিণী সভার পক্ষ থেকে আজ এখবর

Khowai-Lions Club:

খোয়াই লায়ন্স ক্লাবের উদ্যোগে আজ খোয়াই ব্লকের পূর্ব সোনাতলা গ্রামে এক মেগা স্বাস্থ্য শিবির অনুষ্ঠিত হয়। এই শিবিরে মেডিসিন, চক্ষু, স্ত্রীরোগ, ডায়াবেটিস সহ অন্যান্য রোগের চিকিৎসা পরিষেবা দেওয়া হয় সম্পূর্ণ বিনামূল্যে।

Update Akashvani :

এখবর শুনছেন, আকাশবাণী আগরতলা কেন্দ্র থেকে।

#####Sound Byte#####

আকাশবাণীর সংবাদের আপডেট পেতে লগ ইন করুন – ডব্লিউ. ডব্লিউ. ডব্লিউ ডট নিউজ অন এ আই আর ডট কম এবং নিউজ অন এ-আই-আর অ্যাপ, এবং টুইটার ও ফেসবুক প্ল্যাটফর্মে-এ এ-আই-আর-নিউজ-এলার্টস-এ। ইউ-টিউব-এ লক্ষ্য করুন নিউজ-অন-এআইআর-অফিসিয়াল-এ।

এছাড়াও আকাশবাণী আগরতলার সংবাদ আপডেট পেতে দেখুন টুইটার বা এক্স হ্যান্ডলে আকাশবাণী নিউজ আগরতলা / ফেসবুকে এ-আই-আর নিউজ আগরতলা এবং ইউ টিউবে আকাশবাণী নিউজ আগরতলা।

Tribal Festival:

কেন্দ্রীয় জনজাতি বিষয়ক মন্ত্রী জুয়েল ওরাম আজ ঘোষণা করেছেন, আগামী ২রা মার্চ থেকে ২৪শে মার্চ পর্যন্ত দেশজুড়ে আদিবাসী সম্প্রদায়ের সমৃদ্ধ সাংস্কৃতিক ঐতিহ্য উদযাপন করবে। নয়াদিল্লিতে সংবাদমাধ্যমকে তিনি জানান, জনজাতি বিষয়ক মন্ত্রকের উদ্যোগে আদিবাসী সম্প্রদায়ের সমৃদ্ধ সাংস্কৃতিক ঐতিহ্য উদযাপনে থাকবে জনজাতি ভিত্তিক শিল্প মেলায় জনজাতি সঙ্গীত উৎসব এবং আরও নানা কর্মসূচি।

এই সমস্ত অনুষ্ঠানে অংশগ্রহণকারীরা তাদের শিল্পকর্ম, সঙ্গীত, সংস্কৃতি এবং চিত্রকলা দেশব্যাপী দর্শকদের সামনে উপস্থাপনের সুযোগ পাবেন। তিনি বলেন, সারা দেশ থেকে প্রায় এক হাজার অংশগ্রহণকারী এই কর্মসূচিতে যোগ দেবেন।

PM:

প্রধানমন্ত্রী নরেন্দ্র মোদী আজ গুজরাটের সানন্দে মাইক্রোন সেমিকন্ডাক্টর টেকনোলজি ইন্ডিয়া প্রাইভেট লিমিটেডের সেমিকন্ডাক্টর অ্যাসেম্বলি, টেস্ট ও প্যাকেজিং সুবিধার উদ্বোধন করেন। এই উদ্বোধন ভারতের সেমিকন্ডাক্টর উৎপাদন যাত্রায় একটি গুরুত্বপূর্ণ মাইলফলক।

অনুষ্ঠানে প্রধানমন্ত্রী বলেন, ভারতে আয়োজিত ইন্ডিয়া এআই ইমপ্যাক্ট সামিট বিশ্বকে তার এআই ক্ষমতার সাথে পরিচয় করিয়ে দিয়েছে।

তথ্য প্রযুক্তি মন্ত্রী অশ্বিনী বৈষ্ণব বলেন প্রধানমন্ত্রী নরেন্দ্র মোদীর নেতৃত্বে দেশের ইলেকট্রনিক্স উৎপাদন ছয় গুণ বৃদ্ধি পেয়েছে, যেখানে ইলেকট্রনিক্স রপ্তানি ৮ গুণ বৃদ্ধি পেয়েছে। তিনি বলেন, মোবাইল ফোন এখন দেশের শীর্ষ রপ্তানি পণ্যের মধ্যে অন্যতম।

Retirement of Chandan Lekha Paul:

চাকরি থেকে অবসর নিলেন আগরতলা আকাশবাণী কেন্দ্রের বাংলা সংবাদ পাঠিকা ও অনুবাদিকা চন্দনলেখা পাল। আকাশবাণী আগরতলা কেন্দ্রের কনফারেন্স হলে আজ এক অনুষ্ঠানে তাকে বিদায় সংবর্ধনা জানানো হয়। উপস্থিত ছিলেন অফিসের প্রাক্তন উপ অধিকর্তা শুভাশিস চন্দ, সহকারী অধিকর্তা পিনাকী সরকার, আগরতলা দূরদর্শন কেন্দ্রের সহকারী অধিকর্তা কুণাল সিন্ধে সহ আকাশবাণী আগরতলার সঙ্গে যুক্ত সংবাদ বিভাগের সমস্ত স্তরের কর্মীরা। আবেগঘন এই অনুষ্ঠানে বিগত কয়েক দশকে শ্রীমতি পালের সংবাদ সংক্রান্ত ভূমিকা এবং প্রত্যেকের সঙ্গে ব্যক্তিগত সম্পর্কের উপর আলোকপাত করেন উদয় শংকর ভট্টাচার্য, স্বপন চক্রবর্তী, চিত্ত দেববর্মা, সরজু চক্রবর্তী, অনুপম ভট্টাচার্য, লক্ষণ ঘটক, নির্মলেন্দু আচার্য, ডঃ মনিশা কর্মকার, শান্তা ভৌমিক, কল্পনা দেববর্মা প্রমুখরা।

অনুষ্ঠানে আকাশবাণী আগরতলার প্রাক্তন উপ অধিকর্তা শুভাশিস চন্দ বলেন, চন্দনলেখা পাল দীর্ঘ বছর যে দায়িত্ব পালন করে গেছেন, আগামীদিনে সবাইকে ঐক্যবদ্ধভাবে এই দায়িত্ব নিতে হবে। আগরতলা দূরদর্শন কেন্দ্রের সহকারী অধিকর্তা কুণাল সিন্ধে বলেন, তিনি আড়াই বছর বিভাগের দায়িত্বে থাকার সময় শ্রীমতি পালের গুণপনা ও বন্ধুত্বপূর্ণ ব্যবহার কাজকে মসৃণ করেছে। আকাশবাণী আগরতলা কেন্দ্রে সংবাদ বিভাগের প্রধান পিনাকী সরকার বলেন,

শ্রীমতি পাল দীর্ঘবছর ধরে মা ও বড় বোনের মতো সবাইকে আগলে রেখে কাজের পরিসরকে সহজ করে রেখেছেন। সংবর্ধনার জবাবে শ্রীমতি পাল বলেন, আকাশবাণী আগরতলা তাঁকে পরিচয় দিয়েছে। তিনি এই প্রতিষ্ঠানকে কখনও ভুলতে পারবেন না।

উল্লেখ্য, শ্রীমতি পাল আকাশবাণী আগরতলার প্রথম নিয়মিত সংবাদ পাঠিকা। তিনি ১৯৯৪ সালে আকাশবাণী আগরতলায় এই দায়িত্বে যোগ দিয়েছিলেন।

Arshia Das:

মহিলা আন্তর্জাতিক মাস্টার অর্শিয়া দাস রাজ্যে ফিরেই উষ্ণ সংবর্ধনা পেলো। আজ বিকেলে আগরতলা বিমানবন্দরের রাজ্য দাবা সংস্থার পক্ষ থেকে সংবর্ধনা জানানো হয়। সংস্থার সচিব মিঠু দেবনাথ, কার্যকরী সভাপতি প্রশান্ত কুন্ডু প্রমুখ সংবর্ধনা জানান। সার্বিয়ার মহিলা আন্তর্জাতিক মাস্টার নর্ম পেয়ে রাজ্যে ফিরে এলো অর্শিয়া।

Police -Press Cricket:

পুলিশ সপ্তাহ উপলক্ষ্যে আজ ত্রিপুরা পুলিশের সঙ্গে আগরতলা প্রেস ক্লাবের মধ্যে এক প্রীতি ক্রিকেট ম্যাচ অনুষ্ঠিত হয়। নরসিংগড়ে পিটিসি মাঠে আয়োজিত ম্যাচে প্রথমে ব্যাট করতে নেমে আগরতলা প্রেস ক্লাব ১৬ ওভারে সাত উইকেট হারিয়ে ৬২ রান সংগ্রহ করে। জবাবে খেলতে নেমে ত্রিপুরা পুলিশ ১০ ওভার ৪ বলে চার উইকেট হারিয়ে জয়ের জন্য নির্ধারিত ৬৩ রান তুলে নেয়।

Police Cricket- Sepahijala:

পুলিশ সপ্তাহ উদযাপন উপলক্ষে আজ সিপাহীজলা জেলা পুলিশ ও জেলার সংবাদকর্মীদের মধ্যেও এক প্রীতি ক্রিকেট ম্যাচ অনুষ্ঠিত হয়। সিপাহীজলা অভয়ারণ্যের ফরেস্ট ট্রেনিং সেন্টারের মাঠে আয়োজিত এই ম্যাচে সিপাহীজলা জেলা পুলিশ প্রথমে ব্যত করতে নেমে নির্ধারিত ১২ ওভারে ৬ উইকেটের বিনিময়ে ১২৯ রান সংগ্রহ করে। জবাবে খেলতে নেমে সিপাহীজলার জেলার সংবাদ কর্মীরা ৬ উইকেট হারিয়ে জয়ের লক্ষ্যে পৌঁছে যায়।

Weather:

আগামীকাল আকাশ আংশিক মেঘাচ্ছন্ন থাকবে। আজ দিনের সর্বোচ্চ তাপমাত্রা ছিল ৩১.২ ডিগ্রি সেলসিয়াস এবং সর্বনিম্ন ১৫ ডিগ্রি সেলসিয়াস। আগামীকাল দিনের সর্বোচ্চ তাপমাত্রা ৩২ ডিগ্রি সেলসিয়াস এবং সর্বনিম্ন ১৬ ডিগ্রি সেলসিয়াসের কাছাকাছি থাকতে পারে।
